

MALAYSIA

DEWAN RAKYAT

ATURAN URUSAN MESYUARAT

NASKHAH SAHIIH/BAHASA MALAYSIA

<http://www.parlimen.gov.my>

HARI KHAMIS, 19 NOVEMBER 2015, PUKUL 10.00 PAGI

Bil. 53

PERTANYAAN-PERTANYAAN BAGI JAWAB LISAN

1. PR-1333-L71052
Datuk Ikmal Hisham bin Abdul Aziz [Tanah Merah] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan adakah Kementerian berhasrat menubuhkan unit khas memantau harga barangan di kawasan luar bandar yang dilaporkan sering dimanipulasikan oleh peniaga.
2. PR-1333-L71054
Tuan Su Keong Siong [Ipoh Timor] minta **MENTERI PENDIDIKAN TINGGI** menyatakan dengan terperinci jumlah bilangan kelulusan pinjaman PTPTN kepada pelajar-pelajar IPT untuk tahun 2015. Apakah langkah-langkah yang akan diambil oleh Kerajaan untuk memudahkan proses permohonan dan pengeluaran pembiayaan PTPTN kepada pelajar-pelajar.
3. PR-1333-L71560
Tuan Haji Mohd Fasih bin Haji Mohd Fakeh [Sabak Bernam] minta **MENTERI PERTANIAN DAN INDUSTRI ASAS TANI** menyatakan setakat manakah bekalan makanan seperti beras, sayur-sayuran, buah-buahan dan ternakan yang dikeluarkan dalam negara ini dapat memenuhi permintaan rakyat negara ini dan nyatakan jumlah import bekalan makanan bagi permintaan rakyat negara ini serta langkah Kerajaan meningkatkan pengeluaran sektor agro makanan bagi mencapai dan memenuhi tahap sara diri.
4. PR-1333-L70588
Tuan Abdullah Sani bin Abdul Hamid [Kuala Langat] minta **PERDANA MENTERI** menyatakan langkah-langkah yang perlu diambil dalam memastikan menjelang 2020 pendapatan pekerja dapat mencapai RM2,500 seperti mana yang diumumkan dalam Rancangan Malaysia Ke-11.
5. PR-1333-L70853
Dato' Hasan bin Arifin [Rompin] minta **MENTERI DALAM NEGERI** menyatakan statistik tangkapan Pendatang Asing Tanpa Izin (PATI) yang telah dibuat dari tahun 2012 sehingga terkini, dan berapakah kos sewaktu dalam tahanan dan kos penghantaran pulang PATI yang ditanggung oleh pihak Kerajaan.

6. PR-1333-L70820
Tuan Julian Tan Kok Ping [Stampin] minta **MENTERI KESIHATAN** menyatakan secara terperinci kontrak di antara Layang-Layang Aerospace dengan Hospital Umum Sarawak semenjak ianya dimulakan sehingga sekarang. Senaraikan kos yang terlibat, jenis perkhidmatan serta perkhidmatan yang telah pun dilaksanakan. Jika terlibat dengan penerbangan, senaraikan dari segi jumlah "*flight time*", jarak serta jumlah "*payload*" mahupun jumlah penumpang yang telah pun diterbangkan.
7. PR-1333-L70531
Puan Hajah Normala binti Abdul Samad [Pasir Gudang] minta **MENTERI KERJA RAYA** menyatakan apakah status terkini bagi Projek Menaik Taraf Lebuhraya Pasir Gudang Fasa 1 dan Fasa 2.
8. PR-1333-L70353
Tuan Gooi Hsiao-Leung [Alor Setar] minta **PERDANA MENTERI** menyatakan dengan spesifik projek-projek pembangunan yang telah diluluskan di bawah RMKe-11 untuk negeri Kedah.
9. PR-1333-L71143
Ir. Shaharuddin bin Ismail [Kangar] minta **MENTERI PENDIDIKAN** menyatakan apakah faktor yang mendorong penangguhan syarat lulus Bahasa Inggeris dalam Sijil Pelajaran Malaysia yang telah diumumkan baru-baru ini dan apakah bentuk kajian yang telah dijalankan bagi menyokong keputusan yang telah dibuat oleh Kementerian.
10. PR-1333-L70167
Tuan Idris bin Haji Ahmad [Bukit Gantang] minta **MENTERI KESIHATAN** menyatakan adakah pihak Kerajaan sudah membuat kajian baik buruk mengenai restoran 24 jam terhadap kesan sosial dan kesihatan kepada penduduk di negara ini.
11. PR-1333-L69494
Dato' Sri Haji Abdul Azeez bin Abdul Rahim [Baling] minta **MENTERI SUMBER ASLI DAN ALAM SEKITAR** menyatakan adakah Kerajaan berhasrat meluluskan lebih banyak Projek Tebatan Banjir bagi menyelesaikan masalah-masalah banjir dan air naik yang semakin meruncing bahkan di kawasan luar bandar seperti cadangan Projek Tebatan Banjir Mukim Kupang di Parlimen Baling.
12. PR-1333-L69788
Puan Siti Zailah binti Mohd Yusoff [Rantau Panjang] minta **MENTERI PENDIDIKAN** menyatakan sejauh mana kajian perlaksanaan wajib lulus Bahasa Inggeris dalam peperiksaan SPM akan datang supaya tidak senasib dengan pelaksanaan PPSMI satu ketika dulu.
13. PR-1333-L71500
Tuan Fong Kui Lun [Bukit Bintang] minta **MENTERI WILAYAH PERSEKUTUAN** menyatakan kedudukan usaha menaik taraf Jalan Alor, Kuala Lumpur sebagai destinasi dan tarikan pelancong di pusat bandar raya.

14. PR-1333-L70680
Dr. Haji Izani bin Haji Husin [Pengkalan Chepa] minta **PERDANA MENTERI** menyatakan statistik siap bina, dalam pembinaan dan perancangan untuk bina rumah kekal kepada mangsa banjir di Kelantan.
15. PR-1333-L71114
Tuan Anuar bin Abd. Manap [Sekijang] minta **MENTERI KEMAJUAN LUAR BANDAR DAN WILAYAH** menyatakan jumlah semasa pelajar tajaan MARA yang menyambung pengajian di luar negara mengikut tahap pendidikan.
16. PR-1333-L70263
Tuan M. Kulasegaran [Ipoh Barat] minta **MENTERI PENDIDIKAN** menyatakan status atau perkembangan terkini ke atas peruntukan yang telah diperuntukkan oleh Kerajaan untuk pembangunan sekolah Tamil iaitu sejumlah RM100 juta pada tahun 2012 dan 2013 dan RM50 juta pada tahun 2014.
17. PR-1333-L70568
Tuan Anyi Ngau [Baram] minta **MENTERI KEMAJUAN LUAR BANDAR DAN WILAYAH** menyatakan apakah rancangan pihak Kementerian untuk memperluaskan penyambungan bekalan elektrik di kawasan Baram terutamanya di Long Bemang, Long Ikang, Long Bedian dan Long Wan.
18. PR-1333-L70288
Dato' Fauzi bin Abdul Rahman [Indera Mahkota] minta **MENTERI SUMBER ASLI DAN ALAM SEKITAR** menyatakan sebagai Pengerusi Majlis Tanah Negara, berapakah rekod Tanah Simpanan Melayu di setiap negeri bagi setiap 10 tahun dari tahun 1960, 1970, 1980, 1990, 2000, 2010 dan pada akhir tahun 2014.
19. PR-1333-L69691
Datuk Hajah Norah binti Abd Rahman [Tanjung Manis] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan adakah Kementerian bercadang membuat kajian untuk menyeragamkan sistem bayaran meletak kereta di seluruh Malaysia yang sekarang mempunyai beberapa sistem seperti penggunaan mesin dan wang syiling, kupon dan mesin pembayaran kepada sistem yang menggunakan kad sebagai contoh kad "*Touch n Go*" atau lain-lain yang berkonsep "*cashless*".
20. PR-1333-L70089
Dato' Mansor bin Othman [Nibong Tebal] minta **MENTERI KEWANGAN** menyatakan usaha-usaha yang dilakukan oleh Kerajaan bagi memastikan pengurusan sumber kerajaan yang teratur dan efisien serta boleh menangani isu pembaziran dan penyelewengan.
21. PR-1333-L71178
Tuan Haji Ahmad Lai bin Bujang [Sibuti] minta **MENTERI DALAM NEGERI** menyatakan apakah perkembangan Dasar Kerajaan Malaysia untuk mencapai negara bebas dadah menjelang 2015 dapat dicapai dan berapakah jumlah perbelanjaan untuk menangani masalah dadah sejak 2008 hingga 2015. Sejauh manakah penglibatan NGO seperti Persatuan PENGASIH dan PEMADAM.

22. PR-1333-L71280
Tuan Mohamed Azmin bin Ali [Gombak] minta **MENTERI KEWANGAN** menyatakan apakah bentuk saluran dan mekanisme yang digunakan oleh Kerajaan untuk mengagihkan hasil kutipan GST kepada rakyat.
23. PR-1333-L69941
Dato' Shamsul Anuar bin Haji Nasarah [Lenggong] minta **MENTERI KOMUNIKASI DAN MULTIMEDIA** menyatakan apakah Kementerian ada cadangan meminda atau merangka akta baru berkaitan penggunaan media sosial dalam negara ini.
24. PR-1333-L69986
Dato' Dr. Mujahid Yusof Rawa [Parit Buntar] minta **MENTERI DALAM NEGERI** menyatakan program penghantaran pulang pendatang tanpa izin ke negara asal.
25. PR-1333-L71372
Tan Sri Datuk Seri Panglima Annuar bin Musa [Ketereh] minta **MENTERI KEWANGAN** menyatakan strategi pelaksanaan program BAHTERA sebagai landasan dan pemacu jaringan perniagaan untuk menaik taraf ekonomi Bumiputera menjelang 2020 dan dalam usaha membina ekosistem sokongan yang lebih mantap antara sektor awam dan swasta berdasarkan lima strategi Rancangan Malaysia Ke-11.
26. PR-1333-L70468
Tuan Ng Wei Aik [Tanjong] minta **MENTERI PENGANGKUTAN** menyatakan rasional perlunya membawa resolusi di peringkat Majlis Keselamatan Pertubuhan Bangsa-Bangsa Bersatu untuk menubuhkan sebuah tribunal antarabangsa bagi isu MH17 sehingga divetokan oleh Rusia walaupun Malaysia boleh menandatangani Rome Statute of the International Criminal Court supaya kes tersebut dapat difailkan ke Mahkamah Jenayah Antarabangsa dengan serta-merta.
27. PR-1333-L69605
Dato' Abdul Manan bin Ismail [Paya Besar] minta **MENTERI DALAM NEGERI** menyatakan tiada tangkapan awal dilaksanakan terhadap dalang perhimpunan haram BERSIH 4.0 walaupun Polis Diraja Malaysia (PDRM) mengesahkan BERSIH 4.0 adalah pertubuhan tidak berdaftar dan gagal mendapatkan kebenaran daripada Dewan Bandaraya Kuala Lumpur (DBKL).
28. PR-1333-L71181
Tuan Hee Loy Sian [Petaling Jaya Selatan] minta **MENTERI KEWANGAN** menyatakan :-
- (a) bagaimana kejatuhan nilai Ringgit Malaysia yang mendadak memberi kesan kepada ekonomi negara; dan
 - (b) langkah-langkah Kerajaan memastikan Ringgit Malaysia berdaya saing di pasaran global.

29. PR-1333-L69721
Dato' Haji Mohd Zaim bin Abu Hasan [Parit] minta **MENTERI LUAR NEGERI** menyatakan sejauh mana pencapaian matlamat ASEAN COMMUNITY 2015 sehingga sekarang. Dan apakah cabaran utama bagi mencapai matlamat yang ditetapkan.
30. PR-1333-L70032
Tuan Er Teck Hwa [Bakri] minta **MENTERI DALAM NEGERI** menyatakan bilangan sindiket pengemis Luar Negara dan tempatan yang beroperasi, telah ditahan, didakwa dan dihukum mengikut pecahan negeri, umur, jantina dan negara asal setiap tahun dari 2010 sehingga 2015.
31. PR-1333-L69830
Dr. Noor Azmi bin Ghazali [Bagan Serai] minta **MENTERI PERTANIAN DAN INDUSTRI ASAS TANI** menyatakan adakah Kerajaan bersedia untuk membekalkan benih padi MR284 ini ke semua negeri secara menyeluruh dan adakah Kementerian bersedia untuk memberi khidmat nasihat dari pelbagai agensi untuk pelaksanaannya, kerana padi varieti MR284 adalah lebih tegap, lebih tahan rintangan penyakit, lebih hasil dan lebih lembut nasi yang dihasilkan. Benih ini dapat hasilkan 9 ke 10 tan per hektar sawah padi.
32. PR-1333-L71175
Tuan Ahmad Marzuk bin Shaary [Bachok] minta **MENTERI PELANCONGAN DAN KEBUDAYAAN** menyatakan apakah insentif sektor pelancongan yang boleh dimanfaatkan oleh usahawan-usahawan muda di kawasan pesisir pantai. Nyatakan kawasan pantai yang paling berjaya dimajukan oleh usahawan-usahawan muda dalam industri pelancongan.
33. PR-1333-L71009
Tuan Shamsul Iskandar bin Mohd Akin [Bukit Katil] minta **MENTERI PERTANIAN DAN INDUSTRI ASAS TANI** menyatakan berapakah tambahan di dalam nilai import barangan makanan dari bulan Januari 2015 hingga September 2015 akibat dari kejatuhan nilai Ringgit berbanding Dollar Amerika Syarikat.
34. PR-1333-L70373
Tan Sri Datuk Seri Panglima Joseph Pairin Kitingan [Keningau] minta **MENTERI LUAR NEGERI** menyatakan apakah status penyelesaian isu tuntutan Filipina terhadap Sabah dan apakah tindakan Kerajaan Malaysia terhadap kenyataan Presiden Filipina baru-baru ini yang menyatakan Kerajaan Filipina akan terus mempertahankan tuntutan mereka terhadap Sabah.
35. PR-1333-L70729
Datuk Noor Ehsanuddin bin Mohd Harun Narrashid [Kota Tinggi] minta **MENTERI KEWANGAN** menyatakan berapakah jumlah syarikat yang mendapat pengecualian cukai *Global Incentive for Trading* (GIFT) dan berapakah jumlah cukai yang dikecualikan yang diperoleh syarikat terbabit pada tahun 2014 sehingga 2015.

36. PR-1333-L70859
Tuan Chong Chieng Jen [Bandar Kuching] minta **PERDANA MENTERI** menyatakan apakah hasil siasatan Pesuruhjaya Pencegahan Rasuah Malaysia dan tindakan lanjutan atas penjualan Tanah Kerajaan Lot 128, 5489, 5490, 5491, 2301, 2301, 2304 dan 5279 semuanya Blok 225 Kuching North Land District kepada Standard Parade Development Sdn. Bhd. dengan yang harga yang hanya 20% daripada harga pasaran semasa.
37. PR-1333-L69899
Dr. Azman bin Ismail [Kuala Kedah] minta **PERDANA MENTERI** menyatakan tentang penukaran jawatan Peguam Negara Tan Sri Abdul Ghani Patail ketika beliau secara aktif terlibat dengan kes yang melibatkan YAB Perdana Menteri sendiri. Apakah tindakan YAB Perdana Menteri ini tidak bercanggah dengan prinsip urus tadbir negara yang baik (*good governance*).
38. PR-1333-L71232
Tuan Oscar Ling Chai Yew [Sibü] minta **MENTERI PENDIDIKAN** menyatakan pengiktirafan kelayakan UEC oleh UNIMAS yang diumumkan oleh Kerajaan Negeri Sarawak. Apakah syarat-syarat yang mengikut pengiktirafan UEC ini.
39. PR-1333-L70193
Dato' Henry Sum Agong [Lawas] minta **MENTERI DALAM NEGERI** menyatakan apakah ada cadangan langkah kawalan oleh Unit Pencegahan Penyeludupan (UPP) di sempadan/pintu masuk yang agak meluas di daerah Lawas.
40. PR-1333-L71112
Tuan Jeff Ooi Chuan Aun [Jelutong] minta **PERDANA MENTERI** menyatakan kedudukan semasa dalam usaha SPRM menangkap Low Taek Jho @Jho Low untuk membantu dalam siasatan skandal kewangan 1MDB secara merentasi sempadan. Kenapa tidak digantung pasport antarabangsanya supaya ia dikerah pulang ke Malaysia secara terdesak.
41. PR-1333-L69801
Dato' Kamarudin bin Jaffar [Tumpat] minta **MENTERI LUAR NEGERI** menyatakan pencapaian-pencapaian yang telah diperoleh oleh Malaysia sebagai pengerusi ASEAN tahun 2015 ini.
42. PR-1333-L70699
Tuan Manivanan a/l Gowindasamy [Kapar] minta **PERDANA MENTERI** menyatakan :-
- (a) apakah rasional Kerajaan Pusat menamatkan perkhidmatan Tan Sri Gani Patail sebagai Peguam Negara secara tergesa-gesa pada 27 Julai 2015 sedangkan beliau sememangnya akan bersara pada 6 Oktober 2015; dan
 - (b) apakah tindakan Kerajaan Pusat untuk memperkukuh peranan Peguam Negara dan fungsi Jabatan Peguam Negara sebagai institusi yang bebas dan independen.

43. PR-1333-L70106
Tuan Nik Mohamad Abduh bin Nik Abdul Aziz [Pasir Mas] minta **MENTERI PENDIDIKAN TINGGI** menyatakan jumlah pelajar Ijazah Sarjana dan PhD yang dilahirkan melalui Program MyBrain yang dilancarkan pada RMK-10 yang lalu.
44. PR-1333-L70003
Tuan Haji Khalid bin Abdul Samad [Shah Alam] minta **MENTERI KEWANGAN** menyatakan apakah yang berlaku dengan modal RM10 juta yang diluluskan oleh Dewan ini bagi penubuhan syarikat AES Solution Sdn. Bhd.
45. PR-1333-L70447
Tuan Wong Sze Phin @ Jimmy [Kota Kinabalu] minta **MENTERI TENAGA, TEKNOLOGI HIJAU DAN AIR** menyatakan pembinaan grid selatan Sabah yang menghubungkan Kimanis dan Tawau. Adakah program bekalan elektrik di Sook Pensiangan berkaitan dengan grid tersebut dan bila bekalan elektrik dapat disalurkan.
46. PR-1333-L70132
Ust. Datuk Dr. Mohd. Khairuddin bin Aman Razali [Kuala Nerus] minta **MENTERI PERDAGANGAN ANTARABANGSA DAN INDUSTRI** menyatakan status terkini Perjanjian Perkongsian Trans-Pasifik (TPPA) dan kesediaan Kementerian untuk membentangkan *cost-benefit analysis* perjanjian tersebut terhadap pelbagai sektor dalam negara ini.
47. PR-1333-L70960
Dato' Ar. Wan Mohammad Khair-il Anuar bin Wan Ahmad [Kuala Kangsar] minta **MENTERI DALAM NEGERI** menyatakan apakah perancangan yang telah dirangka oleh Kerajaan untuk menangani masalah *Love Scam*.
48. PR-1333-L70750
Dato' Johari bin Abdul [Sungai Petani] minta **MENTERI KEWANGAN** menyatakan :-
- (a) senaraikan semua pelaburan dalam dan luar negara oleh Kumpulan Wang Amanah Pencen (KWAP) dan berapakah nilai dalam RM setiap pelaburan dari tahun 2010 hingga Ogos 2015; dan
 - (b) adakah benar KWAP pernah melabur di Mongolia setakat ini dan apakah kedudukan terkini pelaburan tersebut.
49. PR-1333-L70860
Tuan Nga Kor Ming [Taiping] minta **PERDANA MENTERI** menyatakan :-
- (a) siapakah pihak yang menderma US700 juta kepada YAB Perdana menteri dan apakah syarat "derma" itu dibuat; dan
 - (b) di manakah duit itu sekarang.

50. PR-1333-L70617
Tuan Liew Chin Tong [Kluang] minta **PERDANA MENTERI** menyatakan adakah Parlimen bercadang untuk memuat naikkan segala dokumen Parlimen, laporan agensi, jawapan soalan Parlimen dalam web rasmi Parlimen untuk kegunaan orang ramai sebagai salah satu usaha rombakan Parlimen, apakah pendirian Parlimen mengenai inisiatif <http://pardocs.sinarproject.org/> ini.
51. PR-1333-L71208
Dato' Kamarul Baharin bin Abbas [Telok Kemang] minta **PERDANA MENTERI** menyatakan :-
- (a) berapa ramai pegawai Kerajaan yang telah didakwa kerana mempunyai taraf hidup yang tidak melambangkan pendapatan sebenar mereka; dan
 - (b) kaedah pemantauan bulanan atau tahunan oleh SPRM terhadap pengisytiharan harta yang tidak tepat daripada pegawai-pegawai pentadbiran dan agensi-agensi penguat kuasa.
52. PR-1333-L70981
Tuan Ramkarpal Singh a/l Karpal Singh [Bukit Gelugor] minta **PERDANA MENTERI** menyatakan sama ada Kerajaan bercadang meminda '*Judicial Appointment Commision Act, 2009*' (Akta 695) untuk mengecualikan penglibatan Perdana Menteri dalam pemilihan hakim-hakim selaras dengan prinsip "*separation of power*" dan untuk menegaskan kebebasan badan kehakiman sepertimana tujuan Akta tersebut.
53. PR-1333-L71492
Tuan Chua Tian Chang @ Tian Chua [Batu] minta **PERDANA MENTERI** menyatakan adakah Pejabat Perdana Menteri telah membeli alat pengintipan dari sebuah syarikat keselamatan dari Italy pada Mac 2014. Apakah kegunaan peranti sedemikian untuk Pejabat Perdana Menteri.
54. PR-1333-L70595
Datuk Haji Shabudin bin Yahaya [Tasek Gelugor] minta **MENTERI PENGANGKUTAN** menyatakan adakah pihak Kementerian ada membuat penilaian semula berkaitan kualiti pelekat cukai jalan (*Roadtax*) bagi kenderaan yang mana sukar untuk ditanggalkan jika ditampal terus pada cermin kenderaan, malah jika ditampal bersama pelapik akan mudah tertanggal.
55. PR-1333-L69744
Dato Sri Dr. Muhammad Leo Michael Toyad Abdullah [Mukah] minta **MENTERI PENDIDIKAN** menyatakan berapa buah sekolah gantian yang akan dibina di Sarawak, di kawasan sekolah yang telah diambil dari Kerajaan tempatan, dalam Rancangan Malaysia ke-11.

56. PR-1333-L71537

Tuan Sim Tong Him [Kota Melaka] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan cara dan kadar untuk mengira caj pembersihan sampah bagi satu perhimpunan:-

- (a) sila berikan justifikasi tentang bilangan sampah dari dua himpunan iaitu Bersih 4 pada 29-30/8/2015 dan Himpunan Baju Merah pada 16/9/2015; dan
- (b) adakah Kementerian mempunyai bukti atau rakaman menunjukkan sampah-sarap ini berasal daripada perhimpunan berkenaan.

57. PR-1333-L69575

Datuk Sapawi bin Ahmad Wasali [Sipitang] minta **MENTERI PERTAHANAN** menyatakan jumlah peruntukan diperlukan bagi memperkukuh aset serta kawalan perairan negara untuk mengelak pencerobohan oleh anasir-anasir luar, yang mengancam keselamatan serta menjejaskan ekonomi akibat aktiviti penyeludupan.

ATURAN URUSAN MESYUARAT DAN USUL-USUL

1. **Menyambung semula pertimbangan ke atas Rang Undang-undang Perbekalan 2016 (D.R. 31/2015) dan Usul Anggaran Perbelanjaan Pembangunan 2016 seperti berikut :-**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari lima puluh dua bilion ringgit (RM52,000,000,000) dibelanjakan daripada Kumpulan Wang Pembangunan bagi tahun 2016, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2016, yang dibentangkan sebagai Kertas Perintah 42 Tahun 2015, adalah diuntukkan di bawah Maksud-maksud yang berkenaan jumlah-jumlah yang bersestentangan dengan butiran-butiran itu di ruangan enam dan tujuh senarai tersebut.”

Dalam Jawatankuasa Sebuah-buah Majlis (18 November, 2015)

- | | | | |
|----|----------------|--|-------------------------------|
| 2. | (D.R. 32/2015) | Rang Undang-undang Kewangan 2015

[Menteri Kewangan] | Bacaan Kali Yang Kedua |
| 3. | (D.R. 28/2015) | Rang Undang-undang Perbadanan Insurans Deposit Malaysia (Pindaan) 2015 - Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang”
(22 Oktober 2015)

[Menteri Kewangan] | Bacaan Kali Yang Kedua |
| 4. | (D.R. 30/2015) | Rang Undang-undang Syarikat 2015

[Menteri Perdagangan Dalam Negeri, Koperasi dan Kepenggunaan] | Bacaan Kali Yang Kedua |
| 5. | (D.R. 29/2015) | Rang Undang-undang Skim Kepentingan 2015.

[Menteri Perdagangan Dalam Negeri, Koperasi dan Kepenggunaan] | “ |

6. (D.R 33/2015) Rang Undang-undang Tabung Angkatan Tentera (Pindaan) 2015 “

[Menteri Pertahanan]

7. (D.R. 9/2015) Rang Undang-undang Kanun Tatacara Jenayah (Pindaan) 2015 “

[Menteri Dalam Negeri]

8. (D.R. 12/2015) Rang Undang-undang Keterangan (Pindaan) 2015 “

[Menteri di Jabatan Perdana Menteri]

9. (D.R. 24/2014) Rang Undang-undang Dadah Berbahaya (Pindaan) (No. 2) 2014 “

[Menteri Kesihatan]

10. PR-1333-U69963

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa sejak akhir-akhir ini, dan Gerakan Sabah-Sarawak keluar Malaysia (SSKM) kian mendapat perhatian dan sokongan dari sebilangan kecil rakyat dari kedua-dua negeri ini. Bahawa Dewan ini mengambil maklum bahawa, terdapat rungutan-rungutan di kalangan rakyat negeri Sabah dan Sarawak dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau tidak ditunaikan. Dan mengambil maklum juga, antara isu utama yang disuarakan dalam rungutan ini adalah banjir pendatang asing ke negeri Sabah dan di tambah buruk pula dengan pemberian status warga Negara kepada mereka ini. Dan mengambil maklum juga bahawa, setiap kali isu 20 perkara (bagi Negeri Sabah) dan 16 perkara (bagi Negeri Sarawak) dalam Perjanjian Malaysia ini disuarakan, terdapat usaha-usaha pihak tertentu untuk mensesnyapkan isu ini dan akhirnya rungutan-rungutan ini menjadi satu gerakan ketidakpuasan hati rakyat. Dan mengambil maklum juga bahawa, gerakan ketidakpuasan hati rakyat ini telah sampai satu tahap di mana mereka secara terbuka mengelarkan diri mereka sebagai aktivis Sabah-Sarawak keluar Malaysia atau ringkasnya SSKM. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Kita maklum bahawa, mengambil tindakan Undang-undang semata-mata untuk menghalang mereka ini bagi menyuarakan rungutan mereka ini tidak akan menyelesaikan isu yang ditimbulkan, malah akan merumitkan keadaan lagi di mana mereka akan semakin mendapat simpati daripada kalangan rakyat yang lainnya sementara Kerajaan pula dianggap sebagai tidak perihatin dan kuku besi.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka yang menggelarkan diri mereka sebagai SSKM ini."

[Menteri Dalam Negeri]

11. PR-1333-U69964

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat rungutan-rungutan dikalangan rakyat bahawa sejak akhir-akhir ini, perpaduan, keharmonian, kesejahteraan dan kerjasama antara rakyat negara ini yang terdiri dari berbilang kaum dan agama telah terhakis. Dan mengambil maklum juga, antara isu utama menyebabkan perkara ini berlaku kerana terdapat golongan tertentu yang memainkan isu bangsa dan agama sewenang-wenangnya serta rakyat merasakan tidak ada tindakan tegas yang diambil bagi menangani masalah ini. Dan mengambil maklum juga bahawa, Perhimpunan Bersih 4 dan Perhimpunan Rakyat Bersatu baru-baru ini telah menanamkan bibit kebencian serta syak wasangka antara kaum di negara ini. Dan mengambil maklum juga bahawa, Rukun Negara sebagai tonggak perpaduan, keharmonian, kesejahteraan dan kerjasama antara rakyat negara ini secara tidak langsung tidak lagi dihormati dan dipatuhi. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka ini. Kerajaan juga hendaklah menguatkuasakan segala peruntukan Undang-undang yang ada bagi menghalang mana-mana demokrasi atau perjumpaan umum yang membangkitkan isu bangsa dan agama, yang boleh menggugat perpaduan, keharmonian, kesejahteraan dan kerjasama antara rakyat negara ini."

[Perdana Menteri]

12. PR-1333-U69965

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat laporan mengatakan bahawa operasi bot lautan dalam yang beroperasi di negara ini tidak mendatangkan faedah kepada negara ini secara total. Dan mengambil maklum juga, antara isu utama yang disuarakan dalam laporan ini adalah, para pengusaha bot lautan dalam ini menjual minyak diesel bersubsidi kepada bot-bot asing. Dan mengambil maklum bahawa, terdapat juga laporan bahawa tangkapan bot lautan dalam ini dijual kepada nelayan asing yang menawarkan harga yang lebih baik. Dan mengambil maklum juga bahawa, kedua-dua aktiviti yang disebutkan ini telah mendatangkan kerugian yang besar kepada negara ini, sama ada dari segi subsidi diesel mahupun dari segi tangkapan hasil lautan di negara ini dijual ke negara asing.

Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu sistem kawalan yang bersepadu bagi memastikan bahawa semua diesel bersubsidi digunakan dengan niat asal serta tangkapan tersebut hendaklah dipasarkan di negara ini.”

[Menteri Pertanian dan Industri Asas Tani]

13. PR-1333-U69966

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa, isu 1MDB telah mencemarkan nama baik Kerajaan dan Negara Malaysia pada umumnya. Dan mengambil maklum juga, isu 1MDB telah sedikit sebanyak menghakis kepercayaan pelabur asing kepada Sistem Pelaburan di Negara ini. Dan mengambil maklum juga bahawa, isu 1MDB telah disensasikan melalui media sosial, media elektronik dan media asing dengan sewenang-wenangnya yang menggambarkan bahawa syarikat milik Kerajaan ini hampir muflis dan liabilitinya perlu ditanggung oleh Kerajaan. Dan mengambil maklum juga bahawa, hasil daripada kemuskilan ini, rakyat pada umumnya mempersoalkan cara kerja Kerajaan mentadbir 1MDB sehingga mengalami kerugian yang besar dan terpaksa menanggung liability 1MDB. Maka, bagi menangani masalah ini, Dewan Yang Mulia ini hendaklah mengambil ketetapan bahawa, Kerajaan hendaklah memperjelaskan secara terperinci mengenai model perniagaan 1MDB kepada umum agar satu gambaran yang telus dapat mereka perolehi serta mengembalikan kebolehpercayaan rakyat kepada Kerajaan masa kini.”

[Menteri Kewangan]

14. PR-1333-U70485

Tuan Ng Wei Aik [Tanjong] akan mencadangkan:-

“Bahawa Dewan Rakyat ini mengambil ketetapan untuk mengutuk Perhimpunan Rakyat Bersatu yang diadakan pada 16 September 2015 yang sifatnya berbau perkauman serta bertujuan mengapi-apikan sentimen perkauman, termasuk menuntut supaya sekolah-sekolah Cina ditutup, menggelar anggota-anggota polis yang bertugas sebagai “barua Cina”, cuba menimbulkan kekecohan di Jalan Petaling serta mempersoalkan keperluan “Little India” diwujudkan dan tindakan-tindakan yang sewajarnya harus diambil terhadap pihak penganjur dan pihak-pihak yang harus bertanggungjawab.”

[Menteri Dalam Negeri]

15. PR-1333-U70272

Tuan M. Kulasegaran [Ipoh Barat] akan mencadangkan:-

“Bahawa Dewan ini mengambil maklum demi kepentingan negara dan masyarakat sejagat pandangan serius terhadap kestabilan ekonomi dan kemajuan negara harus diberi perhatian sepenuhnya. Oleh yang demikian Dewan ini perlu mengambil maklum mengenai perkara ini dan mengarahkan Kerajaan untuk mengatasi masalah ini.”

[Perdana Menteri]

16. PR-1333-U70255

Dr. Tan Seng Giaw [Kepong] akan mencadangkan:-

“Bahawa Menteri Kewangan membincangkan cara-cara yang diambil untuk mempertahankan nilai ringgit.”

[Menteri Kewangan]

17. PR-1333-U70256

Dr. Tan Seng Giaw [Kepong] akan mencadangkan:-

“Bahawa Menteri Sumber Asli dan Alam Sekitar mendebatkan masalah jerebu di rantau in.”

[Menteri Sumber Asli dan Alam Sekitar]

18. PR-1333-U71552

Tuan Fong Kui Lun [Bukit Bintang] akan mencadangkan:-

“Bahawa Kerajaan mempergiatkan usaha untuk menyatu padukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia.”

[Perdana Menteri]

19. PR-1333-U71553

Tuan Fong Kui Lun [Bukit Bintang] akan mencadangkan:-

“Bahawa Kerajaan memulihkan pilihan raya Kerajaan Tempatan seluruh negara supaya urus tadbir Kerajaan menjadi cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat.”

[Menteri Kesejahteraan Bandar, Perumahan dan Kerajaan Tempatan]

20. PR-1333-U69805

Dato' Kamarudin bin Jaffar [Tumpat] akan mencadangkan:-

“Bahawa Dewan ini memutuskan untuk Malaysia menerima masuk, memberi perlindungan dan akhirnya memberikan taraf kewarganegaraan kepada 1000,000 orang rakyat negara Syria daripada jutaan orang yang sekarang menjadi pelarian di Turki dan Eropah.”

[Perdana Menteri]

21. PR-1333-U69806

Dato' Kamarudin bin Jaffar [Tumpat] akan mencadangkan:-

“Bahawa Dewan ini merakamkan perasaan sedih dan kecewa bahawa perjalanan kerja-kerja Jawatankuasa Kira-kira Wang Negara (PAC) telah tergendala oleh beberapa sebab dan dengan ini memutuskan untuk meminta Tuan Yang di Pertua Dewan Rakyat dengan segera melicinkan semula perjalanan Jawatankuasa itu.”

[Perdana Menteri]

22. PR-1333-U69807

Dato' Kamarudin bin Jaffar [Tumpat] akan mencadangkan:-

“Bahawa Dewan ini amat tidak berpuas hati dengan kemajuan pembinaan rumah-rumah untuk mangsa banjir negeri Kelantan. Oleh itu Dewan ini mendesak Kerajaan Pusat berusaha dengan lebih gigih lagi bersama dengan Kerajaan Negeri Kelantan untuk melipatkali ganda usaha pembinaan rumah-rumah tersebut.”

[Perdana Menteri]

23. PR-1333-U70769

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, hubungan antara kaum mutakhir ini makin meruncing dan jika tidak dibendung akan mencapai tahap amat merbahaya dan akibatnya negara akan hancur seperti yang terjadi di negara-negara lain yang sedang bergolak akibat isu perkauman. Bila rakyat Malaysia berbangsa Dayak, Kadazan, Orang Asal, Cina, Melayu, Jawa, Bugis atau apa suku kaum sekalipun mengkritik dan mempersoalkan hal tatakelola Negara dan kepimpinan Perdana Menteri dan Kabinetnya, rakyat tidak mempersoalkan ras Perdana Menteri. Rakyat mempersoal Perdana Menteri atas kapasiti beliau sebagai Ketua Eksekutif Negara. BERSIH 4.0 menganjurkan demo jalanan kerana mendesak Perdana Menteri memberi jawapan kepada banyak persoalan yang tidak terjawab.

Soal 1MDB, Derma RM 2.6 bilion, Pertukaran Pegawai-pegawai SPRM, Penamatan khidmat Tan Sri Gani Patail sebagai Pendakwa Raya, pembebasan Abdul Razak Baginda yang rapat dengan Perdana Menteri dalam kes pembunuhan Altantuya Shaaribuu yang amat memalukan negara dan banyak lagi isu yang amat-amat mendesak yang tidak dijawab oleh Perdana Menteri secara meyakinkan. Untuk itu Kerajaan mesti membezakan mengkritik Perdana Menteri bukan mengkritik bangsa Perdana Menteri tetapi kerana Perdana Menteri adalah Ketua Eksekutif Negara yang sememangnya boleh dikritik yang dibenarkan oleh sistem pemerintahan yang diamalkan di negara ini.”

[Perdana Menteri]

24. PR-1333-U70770

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, bila UMNO dan NGO yang menyokong UMNO menganjurkan demo jalanan bertemakan Himpunan Maruah Melayu pada 16 September 2015 yang kemarahan disasarkan kepada rakyat kaum Cina, yang dikatakan mendominasi Himpunan BERSIH 4.0 pada 29 dan 30 Ogos 2015, penganjur memilih kaum Cina sebagai fokus serangan. Penganjur membawa posters dan banners tertulis kata-kata provokasi dan perkauman yang amat merbahaya seperti “Ini Tanah Melayu, Cina boleh keluar”. “Bawa parang dan keris. Tetak Cina. Umno perlukan anda”. Sedangkan yang keluar dijalanan pada 29 dan 30 Ogos 2015 rakyat dari berbagai kaum termasuk Melayu dan Bumiputra yang lain. Kaum lain selain Cina juga menyuarakan perasaan tidak puas hati mereka terhadap Perdana Menteri. Di mana yang dikatakan Cina menghina Melayu dan Maruah Melayu dicabar. Kerajaan mesti berjiwa besar. Walaupun Kerajaan Barisan Nasional diterajui oleh UMNO dan Melayu tetapi rakyat negara ini terdiri dari berbagai bangsa yang wajib dilindungi dan dihormati.”

[Perdana Menteri]

25. PR-1333-U70772

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, penyakit Denggi akibat jangkitan nyamuk di Malaysia telah mencapai satu tahap yang merbahaya. Lebih parah kematian akibat penyakit ini sudah diterima sebagai satu yang lumrah dan tidak ada rasa bersalah oleh pemerintah. Kerajaan sepatutnya menubuhkan satu institusi khas bagi melawan wabak ini dengan memberikan peruntukan kewangan yang secukupnya serta membekalkan berbagai pakar bagi menjadikan institusi ini betul-betul memberi tumpukan dan perhatian kepada masalah yang begitu lama tidak dapat diselesaikan. Malaysia mesti memainkan peranan utama dan boleh menjadi juara dalam memerangi penyakit ini bukan sahaja di rantau ini malah di dunia. Kerajaan mesti serius dan komited dalam hal ini.”

[Menteri Kesihatan]

26. PR-1333-U70774

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, Kementerian Belia dan Sukan banyak memberi tumpuan kepada pembangunan sukan tetapi meninggalkan pembangunan belia di belakang. Setiap tahun ribuan anak-anak Malaysia yang keluar dari sekolah dan ramai yang tidak melanjutkan pelajaran ke pengajian tinggi atas berbagai sebab dan alasan. Akibat tidak ada program wajib yang mesti diikuti dan disertai oleh mereka, mereka menjadi satu eset yang amat bernilai yang terbiar dan tidak dimanfaatkan sepenuhnya. Adalah dicadangkan anak-anak ini, didaftarkan dan diwajibkan menyertai Khidmat negara selama dua tahun seperti yang dilakukan dikebanyakkan negara. Semasa dalam program ini, pilih dua atau tiga bidang ilmu yang boleh memberi menafaat berterusan bila mereka tamat program nanti. Sebagai contoh, ilmu motor mekanik dan elektrik. Selepas dua tahun mereka boleh berdikari dan bantuan susulan boleh diusahakan. Untuk memastikan program ini berjaya ianya mesti dilaksanakan sebagai program wajib dan dikembangkan dengan elemen ketenteraan.”

[Menteri Belia dan Sukan]

27. PR-1333-U70776

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, kegiatan merempit oleh anak-anak muda khasnya anak Melayu amat memalukan bangsa dan Kerajaan. Kerajaan seolah-oleh tidak ada jawapan pada permasalahan ini. Mereka yang merempit bukan sahaja membahayakan nyawa mereka juga nyawa orang awam. Adalah dicadangkan pihak polis menggunakan anggota Cawangan Khas bagi meninjau dan kenal pasti ketua kumpulan ini dan menahan mereka atas undang-undang yang sedia ada. Penahanan mereka hendaklah dihebahkan dalam akhbar dan media elektronik. Menahan mereka untuk beberapa malam di lokap dan jika ada bukti yang cukup mendakwa mereka di mahkamah akan menghantar mesej yang jelas bahawa kegiatan mereka amat merbahaya dan amat dibenci oleh masyarakat. Ini mesti dilakukan secara konsisten bukan berkala.”

[Menteri Dalam Negeri]

28. PR-1333-U70806

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gegaja pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan

arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama.”

[Menteri Kesejahteraan Bandar, Perumahan dan Kerajaan Tempatan]

29. PR-1333-U70808

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

[Menteri Dalam Negeri]

30. PR-1333-U70809

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

[Menteri Pendidikan]

31. **Dato’ Seri Dr. Wan Azizah binti Wan Ismail [Permatang Pauh]** akan mencadangkan :-

“Bahawa Dewan ini tidak ada kepercayaan terhadap Yang Amat Berhormat Pekan Dato’ Seri Najib Tun Razak sebagai Perdana Menteri Malaysia.”

[Perdana Menteri]

32. **Tuan Gobind Singh Deo [Puchong]** akan mencadangkan :-

“Bahawa mengikut Peraturan Mesyuarat 43 dibaca bersama Peraturan Mesyuarat 99 Peraturan-Peraturan Majlis Mesyuarat Dewan Rakyat, Dewan Yang Mulia ini mengkaji semula dan mengenepikan keputusan Yang di-Pertua YB Dato Seri Dr. Ronald Kiandee, yang membenarkan usul untuk menggantung Yang Berhormat Tuan Lim Kit Siang, Ahli Parlimen Gelang Patah daripada Perkhidmatan sebagai Ahli Parlimen selama 6 bulan dibahas tanpa rujukan dibuat kepada Jawatankuasa Hak dan Kebebasan sepertimana menurut Peraturan 80A Peraturan-Peraturan Majlis Mesyuarat.”

[Perdana Menteri]

33. **Tuan Mohd Rafizi bin Ramli [Pandan]** akan mencadangkan :-

“Bahawa Dewan ini menggesa supaya Tenaga Nasional Berhad hanya membayar jumlah yang sepadan dengan nilai pasaran aset-aset *Independent Power Producers* (IPP) yang dimiliki oleh 1MDB dan Dewan berpendapat bahawa harga siling mengikut nilai pasaran bagi aset-aset itu adalah Ringgit Malaysia Lapan Bilion (RM8,000,000,000) sahaja”.

[Menteri Kewangan]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2015</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
ST.113	Laporan Tahunan dan Penyata Kewangan Lembaga Lebuhraya Malaysia Bagi Tahun 2014.	19 November 2015